

Badische Landesbibliothek Karlsruhe

Digitale Sammlung der Badischen Landesbibliothek Karlsruhe

Meditationum evangelicarum volumen tripartitum

Creidius, Hartmann

Francofurti ad Moenum, 1682

De secundo

[urn:nbn:de:bsz:31-122776](https://nbn-resolving.org/urn:nbn:de:bsz:31-122776)

dignam, quæ de jure liberorum participet. Hæc erat ἀξιμὴ pugna, ubi omnia in acie novacula constituta videbantur. Quare heroicum animum induit Cananæa, & eleganti inversione responsi vincit invincibilem. Fatetur se esse canem, interim sibi petit dari quod canibus non solet denegari, micas videlicet misericordiæ divinæ.

Hæc demum tentatio est omnium periculosissima, quando indignitas nostra nobis objicitur inter orandum, quod peccatores Deus non exaudiat, Joh. 9. v. 31.

Sed exemplo Cananæa non circumspiciamus de operum meritis, ut hoc modo nostram coram Deo justitiam stabilire velimus, Rom. 10. v. 3. Sed liberè profiteamur nostram indignitatem cum Abrahamo, Genes. 18. v. 27. Daniele, c. 9. v. 18. & Centurione, Matth. 8. v. 8. & micas divinæ misericordiæ imploremus, objicientes ipsi cum Davide suavissimam invitationem tuam, Ps. 27. v. 8. Tunc certe is qui dives est in misericordia, superabundanter dabit plus quàm petimus aut intelligimus, Eph. 3. v. 20.

De Secundo.

Fuit confictus, sequitur eventus, quem læta certaminis catastrophe quasi coronat. Ubi notanda

1. *Christi exclamatio*, quâ austeritatis specie tandem seposita amicam suam faciem ostendit, & victricem Cananæa fidem prædicat. O mulier magna est fides tua, fiat tibi sicut vis.

Videte, quanta sit precationis vis & efficacia. Micas petit, & ecce thesauros divinæ misericordiæ accipit. O instate dilecti, instate precando, & audietis etiam tandem aliquando vocem illam suavissimam, fiat sicut vis: Sicut enim Joseph ad gemitus fratrum se diutius cohibere non poterat, nam commovebantur viscera, & erumpabant lacrymæ, ut textus sonat, Genes. 43. vers. 30. Ita cælestis Joseph ad preces nostras se non potest continere, sed prorumpit tandem: Ego sum JESUS frater vester, nolite timere: Conturbata sunt viscera mea super te, miserans miserabor tui, Jerem. 31. v. 20.

2. *Filiæ sanatio*. Nam eo ipso momento filia liberatur à dæmonio, Marc. 7. vers. 29. 30. Unde apparet divinæ vocis Christi ἐνέγγηα, quæ filiam ad Cananæa absentem penetrat, & Diabolum expellit. Quapropter veneremur ipsum, & collaudemus Deum, qui tantam virtutem & majestatem homini Christo concessit, Matth. 9. v. 8.

Dominica Oculi.

Evangelium Luc. II. vers. 14. 18.

CUM Simson heros ille incomparabilis descenderet cum Parentibus suis in Thamnatha, ecce catulus leonis rugiens ipsi occurrit. Irruit autem Spiritus Domini in Samson, & dilaceravit leonem

quasi hædum, quamvis nil haberet in manibus, Judic. 14. v. 5.

Admirandum profectò facinus! Sed audite dilecti, quid in hodierna pericope de Christo Evangelista commemoret, cujus

M 3

typus